




EQQARTUUSSISOOQATAASARTUT

Eqqartuussisooqataasartunut ilitsersuut





TIKILLUARIT

Eqqartuussisooqataasartut allanut eqqartuusseqataasassaaitit. Suliaq annertuumik akisussaaffiliuvoq ilanneeriarluni artornartoq.

Eqqartuussisut kisimiillutik pinerluttulerinermi suliani eqqartuussineq ajorput. Inatsisit tunngaviusut najoqqutaralugit innuttaasut eqqartuussisooqataasussaapput.

Inatsisiliorneqarnikuuvoq, pinerluttulerinermi suliani eqqartuussisooqataasartut peqataasassasut, unnerluussisup kiffaanngissusiiaanissaq imaluunniit allatut assingusumik akuliuffigineqarnissamik pineqaatissiisoqarnissaanik piumasaqaatigissappagu. Eqqartuussisooqataasartut eqqartuussisutulli pissaaneqartigipput, unnerluutigineqartup eqqartuunneqarnissaa qanorlu pineqaatissinneqarnissaa eqqarsaatigalugu.

Eqqartuussisooqataasartuq piffissami ukiuni sisamanut toqqarneqartarpoq, agguaqatigiisillugulu ukiumut eqqartuussinerni sisamani peqataasarluni. Eqqartuussisooqataasussatut toqqarneqaruit aallaavittut suliaassannut piumanngissinnaanngilatit. Innuttaasutut naammassisassaavoq.

Kalaallit Nunaanni eqqartuussisarnermi oqaatsit tassaapput kalaallit danskillu oqaasii. Imaappoq, inimi eqqartuussiviusumi oqaatigineqartut tamarmik uppersaasiissutillu tamarmik suliamut ilaasut, pisariaqartinneqarpat oqaatsit taakku atorlugit paasineqarsinnaasussaapput. Eqqartuussinerni oqalutsit peqataasarpur, taamaalilluni kalaallit danskillu oqaasiisa akornanni eqqartuussinerup nalaani oqaluttaasoqartarluni.

Najukkanni eqqartuussisoqarfik attaveqarfigisinnaajuaannarpat uani akineqanngitsunik apequtissaqaruit.

Inussiarnersumik inuulluaqqusilluta

Kalaallit Nunaanni Eqqartuussivik eqqartuussisoqarfiillu



Uliguat

Nunatsinni eqqartuussivinni suliarinneqqaarfinni eqqartuussisut 1. januar 2020-imili pinerluttulerinermi suliani saqitsaannermilu suliani pingaarnertut isumaqatigiinniarnerni uliguaqartalerput.

Nunatsinni eqqartuussivinni suliarinneqqaarfiusuni uliguat immikkut sanatitaapput.

Imarisai

TIKILLUARIT	3
EQQARTUUSSISOOQATAASARTUT ATUUFFII AKISUSSA AFFILU	6
Innuttaasutut naammassisassaq	6
Qanippallaarneq	6
Atisat pissusilersuutillu	8
Killiligaanani oqaaseqarsinnaaneq nipangiussisussaassuserlu	8
Eqqartuussiviit illutaanni isumannaassuseq	9
.....	9
Ima eqqartuussisooqataasartut aggersarneqartarput	10
Agginngitsoorneq	10
Eqqartuussisooqataasartunik akiliisarneq	10
EQQARTUUSSISOOQATAASARTUNIK PEQATEQARLUNI SULIAT	11
Pinerluttulerinermi suliat suut eqqartuussisooqataasartunik peqateqarluni suliaappat?	11
Eqqartuussisooqataasartunik peqateqarluni suliat ima ingerlasarput	11
Eqqartuussisooqataasartunik peqateqarluni suliat ima aalajangiivigineqartarput	14
Eqqartuussisooqataasartoorusuppit?	16
Eqqartuusseqataasartunngornissamut piumasaqaatit	16
Kalaallit Nunaat eqqartuussisoqarfinnut sisamanut aggorsimavoq	16
.....	17
Nunatsinni Eqqartuussiviit	19
Qinnuteqarit	20

EQQARTUUSSISOOQATAASARTUT ATUUFFII AKISUSSAAFFIILU

Kalaallit Nunaanni pinerluttulerinermi suliani eqqartuussinerni nalinginnaasumik innuttaasut 350-it missaanniittut eqqartuussisooqataasartut peqataasarput.

Eqqartuussisooqataasartut immikkut inatsilerinermut pisinnaasaqartariaqanngilatit. Akerlianik isumaavoq, eqqartuussivimmi ilinnut saqqummiunneqartunut ilumoorlutit isornartorsiullutillu pil-lutit suliamik aalajangeeqataanissat. Suliap pappiarartai atorneqartullu allat eqqartuussivimmi aa-tsaat takussavatit, tamaalillutillu suliami peqataanissat sioqqullugu piareersassanak.

Innuttaasut naammassisassaq

Eqqartuussisooqataasartut suliassaq innuttaasut naammassisassamik taasat ilagaat, aallaavit-tullu eqqartuussisooqataasartuunissannut naaggaarsinnaanngilatit. Taamaattumik eqqartuussi-sooqataassatillutit suliffimmit allamit sulinngissinnaatitaanissat pisinnaatitaaffigivat– sulisitsisuillu piumaffigeqqusaanngilaatit ullut feriarfissatit tassunga atoqqullugit. Naatsorsuutigisariaqarpat, ul-loq taanna eqqartuussisooqataaffigisanni, suliffigisanniit aningaasarsiaqannginnissat, kisianni eq-qartuussisooqataasut Kalaallit Nunaanni Eqqartuussivimmiit imaluunniit eqqartuussisoqarfim-miit eqqartuussisooqataasuuffinniit ajunngitsorsiasaqaarumaarputit. Tamanna ersarinnerusumik ataani eqqaaneqassaaq.

Pisuni immikkut ittuni eqqartuussisooqataanissannut tunuarniuteqarsinnaavutit. Tamanna atuup-poq ass. inunnut atorfimminnit eqqartuussisooqataanissaminnut ajornakusoortitsisunut. Tamanna aamma atuuppoq, 70-inik ukioqalersimaguit, imaluunniit peqqissutsit, ilaquttatit inuussutissarsior-nermiluunniit atukkatit pillugit eqqartuussisooqataasartut suliassat naammassisinnaanngikkuk-ku. Eqqartuussisoqarfimmi eqqartuussisooqataasartussatut toqqagaaffinniit nuukkuit, pisussaajun-naartinneqarnissat qinnutigisinnaavat.

Pisussaajunnaarsinneqarusukkuit, qinnuteqaat eqqartuussisoqarfimmut ilinnik toqqaanikumut nassiutissavat.

Qanippallaarneq

Eqqartuussisooqataaguit inuttut suliamut akuliusimanalluunniit - sunnerneqartussaannngilatit. Ass. suliaq ilinnit tillittoqarsimaneranut, imaluunniit illit aappavilluunniit unnerluutigineqartoq, ilisi-mannittoq, unnerluussisoq, illersuisoq imaluunniit inuit allat suliamut akuusut ilaqutarigukku/ppa-gu, qanippallaarputit suliamilu peqataasinnaanak. Pisussaavutit pissutsit taamaattut piaarnerpaa-mik eqqartuussisumut oqaatigissallugit.

Unnerluutigineqartoq eqqartuussissuserisualuunniit isumaqarunik, eqqartuussisooqataasartoq illersugaqarnatik eqqartuusseqataasinnaanngitsut eqqartuussisunut piumasaqarsinnaapput

eqqartuussisooqataasartumik allamik aggersaasoqarnissaanik. Tamanna ass. peqquteqarsinnaavoq, unnerluutigineqartoq eqqartuussisooqataasartorlu siusinnerusukkut aningaasat pillugit apeqqummik aaqqiagiinngissuteqarsimanerannik. Eqqartuussisup aalajangissavaa ingerlaqqissanersutit, imaluunniit eqqartuussisooqataasartumik allamik aggersaasoqassanersoq.

Suliami peqataanissat sioqqullugu pineratalu nalaani sianigissavat, qanippallaarnerlutit taamaalil-lutillu suliami peqataasinnaanak, ass. unnerluutigineqartoq ilisarimasarigukku. Pingaarnertut isumaqatiginninniarnissaq sioqqullugu qanippallaarnermut apeqqut eqqartuussisumut oqaloqatigin-nissutigineqassaaq. Sumilluunniit nalorninartoqarpat apeqqut eqqartuussisunut apeqqutigisinnaa-vat.

Aammattaaq avataani pisunit sunnerneqaqqusaanngilatit, ass. suliap tusagassiutitigut eqqaaneqarneranit imaluunniit ilaqttavit kammalaativilluunniit akornanni.



INUIAQATIGIINNIK SULLISSINEQ

Eqqartuussisooqataaneq inuiaqatigiinnik sullissineruvoq, ilinnut pisortanit pisussaaffinngortitaasoq. Tassa imaappoq, pisussaavutit suliassaq tigussallugu.

Atisat pissusilersuutillu

Eqqartuussisooqataasutut peqqillutillu qasuersaarluarsimallutit takkuttariaqarputit. Ima atisalersorsimasariaqarputit, suliamut malinnaanissaq illit inuttannit allamut saasaataasinnaatinnagu. Ass. akimut ersittunik atorlutit takkuteqqusaanngilatit, teqqialimmik nasaqarlutit imaluunniit aloqutaannaqarlutit. Takkuteqqusaanngilatittaaq politikkimut assigisaanulluunniit isummersuutinnik ersersitsisut atisat atorlugit, kakiornertit imaluunniit pinnerfaatit nuisatillugit.

Ataqqinarpasissaatit eqqartuussivimmilu assigiinngissusermut nalaassinnaasannut paasinnissinnaassuseqarlutit. Eqqartuussivimmi kalluunnaveersaartumik pissusilersortariaqarputit. Ussersornikkut kiinnersornikkulluunniit, pingaarnertut isumaqatiginninniarnermi pisunut isummernerit allatulluunniit paasinninnerit takuteqqusaanngilat. Tamanna illuinnaasiortutut paasineqarsinnaammat.

Inimut eqqartuussiviusumut oqarasuaat angallattagaq nassaqqusaanngilat. Nerisassanik najoqqagassanillu aamma inimut eqqartuussiviusumut eqqussequsaanngilatit. Inimi eqqartuussiviusartumi imeqartarpoq.

Suliamut peqataasut sapinngisamik eqqartuussiviup avataani qanorluunniit attaviginissai pinngitsooriassavat.

Killiligaanani oqaaseqarsinnaaneq nipangiussisussaassuserlu

Eqqartuussisooqataaguit, nipangiussisussaassusermut malunnaarsaarnermullu tunngasunik immikkut ittunik malittarisassaqarpoq.

Eqqartuussisut aalajangiiniarnerminni oqaluuserisaat taasinerallu pillugit nipangiussisimasussaati-taaneq atuuppoq. Suliat ingerlasut pillugit ilaquuttatit kammalaatitilluunniit oqaloqatigeqqusaanngilatit, aamma eqqartuussivimmi pissutsit ilisimalikkatit pillugit naliginnaalluinnartumik malunnaarsaartariaqarputit.

Allatulli killiligaanak oqaaseqarsinnaavutit, taamaattumillu oqallinnerni tamanut ammasuni peqataasinnaallutit inuttut isummersuutitit saqqummersillugit. Tamanna aamma sammisanut eqqartuussivinnut atassuteqartunut atuuppoq. Taamaattorli aallaaviulluinnartutut suliamut aalajangersimasumut, suliap aalajangiiviginiarnerani kingornaluunniit tusagassiutinut inuilluunniit attaveqatigiittarfianni oqaaseqaqqusaanngilatit.

Sianigisariaqarputittaaq ulluinnarni naliginnaasumik oqaaseqartarnerit pillugu, minnerunngitsumik oqariartuutit sakkortuut politikkimut tunngasut oqaatiginerisa malitsigisinnaammassuk, illit suliaajumaartussani qanippallaartunngortissinnaammatsit. Assersuutigalugu Facebookikkut allakkuit ikiaroornartumik atuisumik eqqartuusserusunnak, tamatuma malitsigisinnaavaa, ikiaroornartumik tigummiaraqarsimaneq pillugu suliani eqqartuussisooqataasartutut peqataasinnaannginnerit.

Eqqartuussiviit illutaanni isumannaassuseq

Eqqartuussineq aallartitsinnagu unikkallarnernullu atatillugu eqqartuussisooqataasartutut inimi assersorsimasumiinnissannut periarfissaqarputit, eqqartuussivimmi atuisuusut allat (illersuisut, eqqartuussissuserisut, unnerluussisut, tusarnaariat il.il.) iserfigisinnaanngisaannik.

Ilaatigut saassussisoqarnerani kalerrisaarutinik eqqartuussiviit illutaani ikkussuisoqarnikuuvoq, eqqartuussisup eqqartuussinerup nalaani ikiortissamik aggersaalluni aallartissinnaasaanik. Pinerluttulerinermi suliani annertuunut atatillugu politiit inimi eqqartuussivimmi najuutikkajupput.

Eqqartuussinerup naammassinerata kingorna eqqartuussiviup illutaata qimannissaa toqqissisimantinnigikkukku, eqqartuussiviup sulisui attavigisinnaavatit, taakku ass. aniffissanik allanik inner-suussinnaavaatsit. Eqqartuussinerup naammassinerata kingorna eqqartuussiviup illutaaniitsiaqqaarnissannuttaaq periarfissaqarputit. Tamanna eqqartuussiviup sulisuinut isumaqatigiissutigineqarsinnaavoq.

Eqqartuussiviup sulisui sillimaniarneq pillugu apeqqutissaqaruit piareersimajuaannarput.

***”Eqqartuussisooqataaneq ulluinnarni suliarisartakkanit
allaanerusumik suliaqarnissamut periarfissaavoq.
Soorlu ukiumut arlaleriarluni suliffimmik paarlaassineq.”***



Ima eqqartuussisooqataasartut aggersarneqartarput

Sulianut tamanut eqqartuussivik eqqartuussisooqataasartunik marlunnik aggersaasarpoq. Pisut ilaanni eqqartuussivik aamma sinniisussanik aggersaasarpoq, eqqartuussisooqataasartuq napparsimalissangaluarpat ikiuussinnaasumik. Taamaakkajuppoq suliani sivilisuumik ulluni arlalinni ingerlassussani.

Eqqartuussisooqataasartut tamarmik eqqartuussiviup sulianik ingerlatsinermi atortuini nalunaarsuqqapput, allatsillu tassaasartut kikkut pinerluttulerinermi suliani aggersarneqarnissaannik toqqaasartut. Eqqartuussisooqataasartut minnerpaamik ullut pingasut periarfissillugit aggersarneqartarput. Naliginnaasumik piffissaq periarfissiissut sivilisunerusassaaq, kisianni pinartoqartillugu sivilinnerusinnaalluni. Pinartoqartillugu aggersaanerit mailikkut oqarasuaatikkulluunniit pisarput. Naliginnaasumik ullormut suliamut ataatsimut aggersarneqartassaait, ilaannilu sulianik marlunniit pingasunut amerlassusilinnut. Suliaq kinguartinneqarpat, ass. ilisimannittoq pingaarutilik takkutinngimmat, piffissakkut kingusinnerusukkut suliap inaarsarneqarfigisassaanut takkuteqqissaait. Suliat ataasiakkaat ima annertutigisarput, ulluni sapaatilluunniit akunnerini arlalinni eqqartuussisooqataasartutut atuunnissat suliakkiutigineqartassalluni.

Isumaqaruit takkutinnginnissanut pissutissaqavillutit, ass. napparsimaneq peqqutingalugu, imaluunniit ullormi pineqartumi aallaqqasussaagavit, eqqartuussivik piaarnerpaamik nalunaarfigissavat. Peqquteqavinnak takkutinngitsooruit akiligassinneqaratarsinnaavutit.

Agginngitsoorneq

Eqqartuussivimmut nalunaaqqaarnak agginngitsuussaguut suliaq amerlanertigut kinguarsarneqartarpoq, eqqartuussivik eqqartuussisooqataasartunik nutaamik ilinnik paarlaasussamik aggersaassammatt. Suliani peqataasut amerlammata– unnerluutigineqartoq, illersuisoq, unnerluussisoq, ilisimannittut, eqqartuussisooqataasut allat eqqartuussisullu– kinguaattoornerit akornutaallutillu pisarissersuutaapput. Eqqartuussisooqataasartuq eqqartuussinissamit peqquteqavinnani agginngitsoortoq, eqqartuussivimmit akiligassinneqaratarsinnaavoq.

Eqqartuussisooqataasartunik akiliisarneq

Eqqartuussisooqataasartutut ullup affaanut 700 kr.-sisassait, ullormullu ilivitsumut 1.100 kr.-it. Sapaatip akunnerisa naanerini ullup affaanut 1.050 koruunisissait, ullormullu ilivitsumut 1.650 koruunisissallutit.

Eqqartuussiviup eqqartuussisooqataasartutut akissarsiatit Akileraartarnermut Pisorta qarfimmuut nalunaarutigissavai, aningaasarsianniillu A-skat-imut ilannganneqassait. Aningaasat kontonnut ikineqassapput, mailillu paasissutissiissutigisimagukku, aningaasarsiavit allagartaat mailikkut pissavat. Eqqartuussisooqataasartut akissarsiaat ullut 14-ikkaarlugit tunniunneqartarput.

EQQARTUUSSISOOQATAASARTUNIK PEQATEQARLUNI SULIAT

Eqqartuussisoqarfinni pinerluttulerinermi suliani, eqqartuussisooqataasartut peqataaffigisaanni eqqartuussisooqataasartut marluujuaannarput eqqartuussisorlu. Eqqartuussisooqataasartut eqqartuussisut naligalugit peqataasarput.

Pinerluttulerinermi suliat suut eqqartuussisooqataasartunik peqateqarluni suliaappat?

Pinerluttulerinermi suliat tamarmik eqqartuussisoqarfinni aallartittarput. Eqqartuussisooqataasartut pinerluttulerinermi suliani tamani peqataassapput, kisianni unnerluussisussaataasut aki-liisitsinissaq kisiat piumasaqaatigippassuk, amerlanertigut eqqartuussisooqataasartut peqataaneq ajorput – suliaq unnerluutigineqartumut annertuumik akuliuffigineqaataanngippat, imaluunniit suliaq immikkut tamanut soqutiginaateqaanngippat.

Eqqartuussisooqataasartunik peqateqarluni suliat ima ingerlasarput

Eqqartuussisoqarfinni eqqartuussisooqataasartut marluk eqqartuussisutullu akuerisaq ataaseq peqataasarput. Eqqartuussisoq eqqartuussisuni siulittaasuvoq. Eqqartuussisut siulittaasuut qeqqani issiajuaannarpoq, eqqartuussisullu siulittaasuata eqqartuussineq aquttarpaa.

Unnerluussisussaataasut unnerluussutip suunera eqqartuussisut ilaasortaannut tamanut tunni-unneqartumi unnerluussummi allaaserisarpaat. Eqqartuussisooqataasutut unnerluussut takkukkuit aatsaat ilinnut tunniunneqassaaq.

Eqqartuussisooqataasartutut nalunaarut atsiussavat, tassani eqqartuussivimmi pisunut malinnaanissat, uppersorsorisallu allaavigalugu, inatsimmilu allassimasut malillugit eqqartuussinissat neriorsuutigalugu.

Eqqartuussineq aallartittarpoq eqqartuussutip atuarneqarneranik. Tamatuma kingorna unnerluussisoq peqquneqakkajuppoq namminerluunniit kissateqakkajulluni suliamut paasissutissiinerunissaminik, tamatuma kingorna suliamut uppersarsaasiissutit takuneqartarlutik. Uppersarsaasiissutit pinerluttulerinermi suliani tamani qitiupput. Unnerluutigineqartoq siulliulluni apersorneqartarpoq, tamatumalu kingorna ilisimannittut apersorneqartarlutik. Uppersarsaatit suliamut pingaarutillit nassuiaatigineqartarput eqqartuussisooqataasunut eqqartuussisunullu takutinneqartarlutik. Paasissutissanik amerlanerusunik perusukkuit apeqquteqarsinnaavutit, kisianni eqqartuussisut siulittaasuannut oqaaseqarsinnaajumaqqaasaatit.

Eqqartuussisut uppersarsaatit tusaallugillu takoreeraangatigit, unnerluussisoq siulliulluni kingornalu illersuisoq tulliulluni suliamut isiginninnerminnik tunngavilersuisarput. Taanna naggataarutaa-sumik oqaaseqarnermik taaneqartarpoq. Eqqartuussisut suliamik aalajangiiniarlutik tunuartinnaagit, unnerluutigineqartoq kingulliulluni oqaaseqarnissaminut periarfissinneqartarpoq.

Eqqartuussisooqataasartutut isummerfigissavat, unnerluutigineqartoq unnerluutigineqaatiminut pisuunersoq. Aamma isummerfigisariaqarsinnaavat iliuuseq siunertatut piaaraluni piliarineqarsi-manersoq – imaluunniit mianersuaalliorneq pineqarnerseq – misissuaanneq. Aalajangiiffiqeqataasavattaaq, unnerluutigineqartup qanoq pineqaatissinneqarnissaa, unnerluutigineqartorlu eqqartuunneqarnermi kingorna tigummisaagallartussanngortinneqarnissaa. Pinerluttulerineri suliamut atatillugu pisut ilaanni aamma taarsiivigineqarnissamik piumasaqaat isummerfigineqarsinnaasarpog. Tamannali eqqartuussisup kisimi aalajangiivigisarpaa.

Unnerluussisussaataasup suliassaraa uppersisissallugu unnerluutigineqartoq pisuusoq. Naapertuuttumik tunngavissalimmik unnerluutigineqartup pisuunera qularnaateqassappat pinngitsuutinneqassaaq. Suliaq nalilernalerukku, eqqartuussivimmi oqaatigineqartut kisiisa pingaarteqqusavatit. Eqqartuussivimmut takkutsinnak atuariingassaqaanngilatit.

”Eqqartuussisooqataasartutut eqqartuussivimmut takkutsinnak atuariingassaqaanngilatit”

EQQARTUUSSISUT IMA INISSEQQASARPOT

EQQARTUUSSISOOQATAASARTOQ EQQARTUUSSISOQ EQQARTUUSSISOOQATAASARTOQ



Saaffiginnittarfik Reception



Eqqartuussisooqataasartunik peqateqarluni suliat ima aalajangiivigineqartarput

Uppernarsaasiineq naggataarutaasumillu oqaaseqarnissaq naammassippata eqqartuussisooqataasartut eqqartuussisullu ataatsimoorlutik suliaq misissussavaat. Eqqartuussut oqaatigineqarsinnaalersinnagu, inimi eqqartuussiviusumi takusatik tusaasatillu oqallisigissavaat taasisinnaassallutillu. Taanna taasinermik taaneqartarpoq. Taasineq tusarnaariat isiginnaaqqusaanngilaat. Eqqartuussisooqataasartut eqqartuussisorlu taasinerup nalaani suut oqaluuserineqarnerinut nipangiussisussaassuseqarput. Tassa imaappoq allanut oqaluttuareqqusaanngilat qanoq oqartoqarsimanersoq. Paasisutissat taasinermeersut ingerlateqqillugilluunniit atornissaat inatsisinut akerliuvoq. Aammattaaq uppernarsaasiissutit assilineriluunniit eqqartuussivik qimakkukku nassaqqusaanngilatit.

Taasinerup nalaani isummerfigineqaqqaassaaq, unnerluutigineqartoq pisuunersoq pinngitsuunersorluunniit. Unnerluutigineqartoq pisuutissagussiuk, unnerluutigineqartup qanoq pineqaatissinneqarnissaa aalajangissavarsi. Aalajangissavarsittaaq pineqaatissinneqarsimasunut inissiisarfimmiit-tussanngortitsinissaq pinngitsoorani pissanersoq imaluunniit piumasaqaaserneqassanersoq, allannillu immikkut ittunik piumasaqaatinik atuutsitsisoqassanersoq, ass. anisitsinermik. Oqallinnerit taasinerusinnaasullu eqqartuussisup aquttussaavai.

Suliani amerlanerni periuseq malillugu suliaq pillugu eqqartuineq, oqallisiginera taasinerataalu akornanni sukannersumik immikkoortitsisoqarneq ajorpoq. Eqqartuussisut siulittaasuata suliaq uppernarsaasiissutillu saqqummiunneqartut naatsumik eqqartoqqaartarpai. Tamatuma kingorna suliaq iluarisamik oqaluuserineqartarpoq. Tassani tamarmik immikkut isummersuutiminnik ersersitsinissaminnut periarfissaqartarput. Tunuarsimaannginnissat pingaaruteqarpoq, kisianni isummat erseqqissumik oqaatigissavat, uppernarsaasiissutit nalornissutaasinnaasunullu apeqqutaasinnaasut pineqartillugit. Oqaloqatigiinnermi ilanngussat tamarmik assilissamik eqqartuussisup ataatsip suliamik qanoq isiginninneranit tamakkiisunngortinneqakkajupput. Taamaattumik taasinissaq pisariaqassanngilaq, eqqartuussisullu paasiinnartussaassavaa inerniliussap isumaqatigiissutigineqarnera. Eqqartuussisut isumaqatigiinngikkunik ileqqusutut taasinermut ingerlaqqissapput.

Aalajangiinerit tamarmik amerlanerussuteqarfiussapput. Eqqartuussisoq kingulliulluni taasisarpoq, eqqartuussisooqataasorlu nukarleq siulliulluni taasisarluni. Taasineq oqaatsitigut pisarpoq, inernalu allanneqartarpoq eqqartuussisumit eqqartuussisooqataasartunillu atsiorneqartarluni.

Eqqartuussutitaa eqqartuussisumit oqaasertaliorneqartarpoq. Eqqartuussisooqataasartut aqqi eqqartuussummi eqqaaneqanngisaannarput. Aalajangerneq isumaqatigiinngiffiusimatillugu ikinne-russuteqartup tamanna eqqartuussummi nalunaarsortinnissaa pisinnaatitaaffigaa. Tamanna pisarpoq allanneqarluni qanoq taanna imaluunniit taakku taasisimanersut. Taanna 'allaanerusumik isumaqarneq'-mik taaneqartarpoq. Taassuma ataatsip imaluunniit taakkua aalajangiinnermi isumaqataanngitsut aqqi eqqaaneqarneq ajorput.

Eqqartuussut oqaatigineqarpat, inerniliineq eqqartuussivimmi atuarneqassaaq. Inimi isersimasut tamarmik tamatuma nalaani nikorfassapput. Eqqartuussummut allaanerusumik isumaqarnermik ilanngussisoqarsimappat, eqqartuussisup tamanna eqqartuussutip oqaatigineqarnerata kingorna erseqqissaatigissavaa. Allaanerusumimmi isumaqarneq pingaaruteqarsinnaavoq, unnerluutigine-

qartup unnerluussisussaataasullu eqqartuussutip suliareqqitassanngortinnissaa eqqarsaatigilerpassuk.

Pisuni ataasiakkaani eqqartuussut ingerlaannaartumik oqaatigineqarneq ajorpoq. Taamaattoqartilugu eqqartuussisooqataasartoq eqqartuussutip oqaatigineqarnissanut takkuttariaqartanngilaq.

***”Eqqartuussisooqataasartut eqqartuussisutulli
pissaaneqartigipput, unnerluutigineqartup
eqqartuunneqarnissaa qanorlu pineqaatissinneqarnissaa
eqqarsaatigalugu”***



Eqqartuussisooqataasartoorusuppit?

Eqqartuussisooqataasartoorusukkuut Kalaallit Nunaanni Eqqartuussivik imaluunniit najukkanni eqqartuussisoqarfiit saaffigiuk

Eqqartuusseqataasartunngornissamut piumasaqaatit

Eqqartuussisooqataasartunngornissannut naleqquttuussaait. ”Tusaamanerlugaassanngilatittaaq” Inatsisartunullu qinersisinnaatitaassallutit. Tamanna ima paasisassaavoq, 18-inik ukioqalereersimassutit, ilungersunartunillu inatsisinik unioqqutitsisimanermut pineqaatissinneqarsimasuussanak. Kalaallit Nunaanni Eqqartuussiviup eqqartuussisooqataasartussatut toqqakkat Pinerluuteqarsimasunik nalunaarsuivimmi nalunaarsorsimanersut misissussavai, soorlu Kalaallit Nunaanni Eqqartuussivik nalunaarfigineqassasoq, piffissap ukiut taakkua sisamat ingerlanerini eqqartuussisooqataasartuuninni, ilungersunartumik pinerluuteqarsimasutut pasillerneqalissaguit.

Tunngaviummik piffissap allattorsimaffiusup atuuffiata ingerlanerani 70-inik ukioqalissaguit eqqartuussisooqataasartunngorsinnaanngilatit. Tamanna aamma atuuppoq, eqqarsartaatsikkut timikkulluunniit peqqutilinnik – eqqartuussivimmi oqaatigineqartunut malinnaasinnaassuseqanngikkuit.

Kalaallit Nunaata Eqqartuussiviisa kiffaanngissuseqarnissaat qulakkeerniarlugu, uani taaneqartut eqqartuussisooqataasartunngorsinnaanngillat: Naalakkersuisut, Naalakkersuisoqarfinni atorfillit, pisortat departementiisa ataani pisortatut atorfillit, eqqartuussivinni politiinilu atorfillit, unnerluussisussaataasut, pineqaatissinneqarsimasunik isumaginnittoqarfik, eqqartuussissuserisut eqqartuussissuserisunullu fuldmægtigit kiisalu ilagiinni uppeqatigiinnilu allani palasit.

Eqqartuussisooqataasartunik toqqaanermut atatillugu, inummut paasissutissat suliarineqassapput. Paasissutissat makkununga tunngakkajupput; ateq, inuup normua, ukiut, najugaq, suaassuseq, atorfiup suunerata taaguutaa, Inatsisartunullu qinersisinnaatitaaneq.

Pisariaqartinneqarsinnaavortaaq paasissutissat pinerlunnermut, peqqinnermut kiisalu inuiannit sorlernit kingoqqiveqarnermut tunngassuteqartut suliarineqarnissaat. Paasissutissat inummut tunngasut suliarineqarneri tamarmik inummut paasissutissat pillugit inatsimmi illersorneqarneri malillugit suliarineqassapput.

Kalaallit Nunaat eqqartuussisoqarfinnut sisamanut aggorsimavoq

Kalaallit Nunaanni sisamanik eqqartuussisoqarfeqarpoq. Eqqartuussisoqarfiit tamarmik eqqartuussimit pisortaasumit aqunneqarput, taassumalu saniatigut eqqartuussisunik, eqqartuussisut allattaannik, aqutsisoqarfirmilu sulisunik piffissaq tamaat atorfilinnik sulisoqarput. Maannakkuugallartuq eqqartuussisoqarfinni eqqartuussisut aqqanillit eqqartuussisunngortitaaqqapput, katillugit aq-qaneq marluunissaat akuerisaavoq.

Eqqartuussisoqarfiit siulersorneqarfiisa sisamaasut saniatigut eqqartuussisoqarfiit illoqarfinni minnerusuni 13-ini eqqartuussisarfegarput. Eqqartuussisarfiit sapaatip akunneranut ataasiarlutik arla-leriarlutilluunniit sulisoqartarput.

Eqqartuussisoqarfik Kujalleq

Qaqortumit siulersorneqarpoq. Eqqartuussisoqarfik eqqartuussisumik pisortaasumik, eqqartuussisumik ataatsimik kiisalu allaffimmiunik sulisoqarpoq.

- *Eqqartuussisarfiit: Narsaq Nanortalillu.*

Eqqartuussisoqarfik Sermersooq

Nuummit siulersorneqarpoq. Eqqartuussisoqarfik eqqartuussisumik pisortaasumik, eqqartuussisunik allanik sisamanik kiisalu allaffimmiunik sulisoqarpoq.

- *Eqqartuussisarfiit: Paamiut, Tasiilaq Ittoqqortoormiillu.*

Qeqqata Eqqartuussisoqarfia

Sisimiunit siulersorneqarpoq. Eqqartuussisoqarfik eqqartuussisumik pisortaasumik, eqqartuussisumik ataatsimik kiisalu allaffimmiunik sulisoqarpoq.

- *Eqqartuussisarfik: Maniitsoq.*

Qaasuitsup Eqqartuussisoqarfia

Ilulissanit siulersorneqarpoq. Eqqartuussisoqarfik eqqartuussisumik pisortaasumik, eqqartuussisumik ataatsimik (pingasunik eqqartuussisoqartussatut akuerisaavoq) kiisalu allaffimmiunik sulisoqarpoq.


- *Eqqartuussisarfiit: Qasigiannguit, Qeqertarsuaq, Uummannaq, Upernavik, Qaanaaq, Aasiaat Kangaatsiarlu.*





Nunatsinni Eqqartuussiviit - Aqqissuussisimernermi diagrammi

Eqqartuussinermi aappassaaneeraluni suliarinniffik



Eqqartuussinermi siullermeeralutik suliarinniffiit

Diagrammimi takutinneqarpoq suliat siullermeerlugit suliarineqarneranni, tassa eqqartuussisoqarfinni imaluunniit Kalaallit Nunaanni Eqqartuussivimmi, suliat aallartinneqartarnersut. Siullermeeralutik suliarinnittut eqqartuussutaat Nunatta Eqqartuussisuuneqarfianut suliareqqitassanngortinneqarsinnaapput. Nunatta Eqqartuussisuuneqarfiata eqqartuussutaa immikkut pisoqartillugu naalagaaffiup iluani eqqartuussivimmut qullerpaamut, Eqqartuussiviit Qullersaannut, suliareqqitassanngortinneqarsinnaavoq.

Kalaallit Nunaanni Eqqartuussiveqarfinni sulisut katillugit 95-it missaanniipput.



Qinnuteqarit

Eqqartuussisooqataasartunngornissamut soqutiginnikkuit qinnuteqarnissamut tikilluaqqusaavutit.

Kalaallit Nunaata Eqqartuussiviani imaluunniit eqqartuussisoqarfimmi eqqartuussisooqataasartus-satut piukkunneqarsinnaavutit qinnuteqarnermi immersugassaattita, pinerluuteqarsimasullu nalu-naarsorneqarfiannut paasissutissanik ilinnut tunngasunik eqqartuussiviup piniarsinnaaneranut akuersissutip atsiornertigut, taamaalilluni eqqartuussivik pinerluuteqarsimasunik nalunaarsorne-qartarfiannut paasissutissanik ilinnut tunngasunik piniarsinnaanngortillugu. Qinnuteqarnissamut paasissutissanillu piniartoqarsinnaaneranut akuersinissamut immersugassat nittartakkatsinni uani nassaarisinnaavatit: www.eqqartuussivik.gl

Eqqartuussisoqarfimmi Kalaallit Nunaanni Eqqartuussivimmiluunniit eqqartuussisooqataasartooru-sukku, Kalaallit Nunaanni Eqqartuussivimmut saaffiginninnissannut info@domstol.gl-imut saaffi-ginninnissannut tikilluaqqusaavutit.

Nunatta Eqqartuussisuuneqarfiani eqqartuussisooqataasartoorusukku, eqqartuussisuuneqarfim-mut post.landsret@domstol.gl-mut saaffiginninnissannut tikilluaqqusaavutit.

Qinnuteqarfissaq kingulleq ulloq 10. september 2021

